

四庫全書

史部

欽定四庫全書

蜀中廣記卷十三

明 曹學佺 撰

名勝記第十三

上川南道

邛州

漢書張騫自河源歸來得高節竹植于邛山故名邛來
郡國志云邛崃山自沈黎直走千里至臨邛環抱為鎮

山圖經云山曰邛崃浸曰邛水民曰邛民毛曰邛竹矣
水經注云江水又逕臨邛縣王莽之監邛也莽改成
都為導江太守為卒正時公孫述為導江卒正治臨邛
志云廢公孫述城在州南十里 華陽國志張儀城臨
邛周迴六里高五丈其制與成都郾同 寰宇記卓王
孫宅在州南五里基方十里耕者往往得銅錢按史記
卓氏之先趙人秦破趙遷卓氏夫妻推輦而出曰吾聞
岷山之下沃野下有蹲鴟乃求遠遷致之臨邛華陽國

志臨邛有古石山出石鑛大如蒜子火燒合之成流支
錢甚剛因置錢官有錢祖廟漢文帝以錢銅賜侍郎鄧
通通假民卓王孫歲取千匹故王孫貨累巨萬億鄧通
錢亦盡天下窠宇記錢山鑄錢即此山也山出木蓮不
異水之芬芳 史記司馬相如成都人素與臨邛令王
吉善相如客舍都亭王吉日往朝卓王孫聞令有貴客為
具召之并召令酒酣令前奏琴曰竊聞長卿好之願以
自娛相如為鼓一再行是時卓王孫有女文君新寡好

音故相如以琴心挑之相如時從車騎甚都文君竊從
戶窺心悅而好之相如乃令侍人重賜文君侍者通殷
勤文君夜奔相如與俱之成都 采蘭雜誌載文君閨

中一井文君手汲則甘香沐浴則滑澤鮮好它人汲之
與常井同本志云白鶴驛有文君井水作酒味釋無可
送李少府之任臨邛詩邛南才作尉調補一何卑發論
惟公幹承家乃帝枝山長風裏棧江蔭石和澌舊井王
孫宅還尋獨有期陸務觀詩落魄西川泥酒杯酒酣幾

度上琴臺青鞋自笑無拘束又向文君井上來 水經
註云江水又與文井江會李冰所導也江上有長堤堤
跨四十里有朱亭亭南有青城山山上有嘉穀山下有
蹲鴟即芋也所謂下有蹲鴟至老不饑卓氏之所以樂
遠徙歟 酈道元又云文井江至蜀郡臨邛與布濮水
合華陽國志云布濮水自布濮來合文井江有火井夜
時光映上昭民欲其火先以家火投之頃許如雷聲火
焰出通耀數十里以竹筒盛其光藏之可拽行終日不

滅也井有二水取井火煮之一斛水得五斛鹽家火煮之得無幾也博物志云臨邛火井諸葛丞相往視之後火轉盛蜀都賦云火井沉熒于幽泉是也隋置火井縣于此舊史云素天置為火井令殘碑尚存有斷其龜趺以作盆盎者立斃圖經云天置嘗登山相縣治其處有相臺山文同寄太博孫公遊火井詩七盤磴道與雲浮下見高林壓縣樓元時始省入州 張說被使在蜀詩即今三伏盡尚自客臨邛歸途千里外秋月定相逢李

頻送友人之蜀詩天際蜀門開西看舉別杯何人不異
禮上客自懷才夜澗青林發秋江綠水來臨邛行樂處
莫到白頭回唐求送友人歸邛州詩鷺鳴山下去滿簾
荷瑤琨放馬荒田草看碑古寺門漸寒沙上雨欲暝水
邊村莫忘分襟處梅花撲酒罇又邛州水亭夜讌送顧
非熊之官詩寂寞邛城夜寒塘對庾樓蜀關蟬已噪秦
樹葉應秋道路連天遠笙歌到曉愁不堪分袂後殘月
正如鉤又發邛州寄友人詩茫茫驅一馬自歎又何之

出郭見山處待船逢雨時曉鷄鳴野店寒葉墮秋枝寂寞
前程去閒吟欲共誰李商隱寄蜀客詩君到臨邛問酒
壚近來還有長卿無金徽却是無情物不許文君憶故
夫梅堯臣送錢駕部知邛州詩細雨梅初熟輕寒麥已
秋路危趨劍道夢穩過刀州秦粟非吳食巴粳類越疇
當壚無復舊試似長卿求范鎮送文與可通判邛州詩
半刺為官羨臨邛自古名何言緹軾寵更侍版輿行仙
籍新年貴賓僚舊日榮壺漿故父老應在半途迎王安

石送文與可通判邛州詩文翁出治蜀蜀士始文章司
馬唱成都嗣音得王揚犖犖漢守孫千秋起相望操筆
賦上林脫巾選為郎擁書天祿閣奇字校偏旁忽乘馭
馬車牛酒過故鄉問君行何為闕隴正繁霜中和助宣
布循吏綴前芳豈特為親榮區區誇一方 鶴山在城
西八里常璩云臨邛名山曰四明亦曰羣羊即今白鶴
也漢胡安嘗於山中乘白鶴仙去弟子即其處建白鶴
臺魏華父營造記曰州之西直治城十里所有山曰白

鶴林麓蒼翠江流縈紆蔚為是州之望隋唐迄今庵院
凡十四所遠有胡安先生授易之洞近有常公諫議讀
書之庵泉有滴珠樹有木蓮白鶴有臺玉兔有踪中峯
信美平雲之觀西岩翠屏萬竹之境皆山中勝處壁間
繪像率范瓊杜措丘文措諸人名筆雖丹青剝落而筆
法具在本山志云前輩丹青則有任子逸范瓊與夫文
同湖州之遺筆文人詞翰則有鄭少微張公庠與夫張
商英王賞趙雍之舊題至於靈鵲去而臺空玉兔潛而

石化此山之有可紀書如此宜其歛西州之勝而為臨
邛無窮之觀也信美亭翠平閣俱在山頂勾龍庭實信
美亭詩擲罌渡水過西頭東面一亭無限幽火井江潮
盤附郭浮圖天際表吾州陸務觀翠屏閣詩把酒孤亭
半日留西崖獨擅寫山秋 按益都耆舊傳胡安臨邛
人聚徒于白鶴山司馬相如從之受經此縣又有林閭
善博學自古天子有輜車之使惟閭與嚴君平知之為
楊雄所師 本志云西十里盤陀山有石刻佛像唐人

鵠吳師二字其上又有郭汾陽師四字五代及宋人皆有書墨 又云西八十里萬松亭魏太和中建于山絕頂今僅遺址文同詩云四野豁嘉亭松門夜不扃水邊來半偈月下殘經又云西百里石盤戍俗呼為望軍頂昔諸葛武侯駐軍于此 碑目云臨邛令封君遺愛碑陳子昂撰又云大唐邛州臨邛縣花置山寺新造無量壽佛石龕像記朝議郎守太子左贊善大夫前殿中侍御史馬宇撰元祐丁卯十二月立碑又云邛州天慶

觀希夷先生詩刻文同跋元豐中元日書

蒲江縣

蒲江者以治枕蒲水也志云南八十步蒲泉方丈許冬
燠夏涼四時不涸蒲草生焉有亭覆其上曰蒲亭方
輿勝覽云浴丹池在蒲江縣之崇真觀世傳軒轅修煉于
此竊山集云嘉泰中常有羣鶴西來翔舞於紫極殿之
前檻自後間歲一至志云紫極觀在蒲江治內 七籤
云主簿山治在邛州蒲江縣界郡主簿王興于此學道

得仙一名長秋山南有石室玉堂松柏生其前本志云
長秋山有卧牛井昔女冠楊正見修煉于此得石卧牛
于下砌井而泉湧出今井碑尚存寰宇記又謂之小可
慕山言登此山景慕仙風非小可也 紀勝云南十五

里莫佛鎮相傳漢文帝時有莫將軍征西南夷歸而學
佛于此其佛臺前石羊虎尚在居民往往于其處得金
銀杜光庭莫公臺詩奇絕巍臺峙濁流古來人號小瀛
洲路通霄漢雲迷晚洞隱魚龍月浸秋舉首摘星河有

浪自天圖畫筆無鈎將軍悟却希夷訣贏得清名萬古
留

大邑縣

寰宇記云大邑縣唐咸亨三年分益州晉原縣置在竊鳴
山東道書云竊鳴山二十四化之第三化也應氏宿山
有二十四洞應二十四氣洞口約濶三尺深不可測每
過一氣則一洞竅開餘皆不見有七十二穴應七十二
候東西二溪出其兩腋太清宮建在頂喙玄真坊建在

項大坪是其背延祥觀在天柱山石柱腰岩是其兩翼
冠子山三峯中峯是其尾乃馬成子張道陵昇仙之處
杜天師竊鳴山詩五氣雲龍下泰清三天真客已功成
人間回首山川小天上凌雲劍佩輕花擁石壇何寂寞
草平轍迹自分明鹿裘高士如相遇不待岩前竊有聲
文同題竊鳴化上清宮詩秘宇壓孱顏飛梯上屈盤清
流抱山合喬樹夾雲寒地古芝英折岩秋石乳乾鼉輪
遊底處空自立層壇東北十五里有青霞峰峯下有碧

玉潭劍南詩藁云青霞嶂碧玉潭皆山水佳處詩云千
岩角逐互吞吐一峯拔起矜崔嵬日光微漏見潭底水
氣上薄雲成堆志云此山常孕雲霧又名霧中山峯頂
有金剛足跡曰金剛臺張俞詩霧山環合自雲川戶有
清溪種玉田萬木桃花不知處幾人曾得問秦年碑目
云竊鳴山柱腰岩有李陽永篆龜竊齊年及陳搏草書
福壽大字 勝覽云平雲亭在大邑之靜惠山蓋文忠
范公鎮所居公熙寧間上䟽論新法致仕既還蜀窮山

水勝處徜徉此山詩云磴道雖云險肩輿亦可行坐來
知日永立處與雲平本志云靜惠山一名東山山下土
城相傳是蜀漢將軍趙雲築蓋雲嘗防羌于此有雲墓
及廟存通志云鳳凰山在大邑西八十里勝覽云鳳
凰山有虎劈泉唐契覺道人結菴于此有虎為之擘地
出泉有栢十圍根盤巨石之上如騎鯨然曰騎鯨栢文
同邛州鳳凰山新禪院記云臨邛郡西北皆大山所叢
行造磅礴深蟠遠走直注大渡限迺蠻謫鬱如雲烟涌

如波濤晴光陰嵐明昧一矚其間孤峯峩然傑立豪峙
首領崖巘腹背隼阜翼開長巒尾掉高岡繁林茂樹綠
藹纈茅園擁森合絳若毛羽地志書之曰鳳凰山者蓋
前人嘗以狀而名之爾唐契覺道人艾草鑿址構庵此
地日禮華嚴秘典以作佛事嘗汲泉澗下頗念其遠有
虎為之擘地出泉澄潔甘凜悉異他所發源甚盛于今
賴之矣

蜀中廣記卷十三

欽定四庫全書

蜀中廣記卷十四

明 曹學佺 撰

名勝記第十四

上川南道

雅州

史記秦始皇二十五年滅楚徙嚴王之族以實此地故
曰嚴道漢為縣屬蜀郡文帝徙淮南王之族於此楊用

脩蜀志補遺引蜀本紀以為許由之友嚴僖所隱地也
漢高六年分置青衣縣水經青衣水出青衣縣西蒙
山東與沫水合註云縣故有青衣羌國竹書紀年孝惠
成王十年瑕陽人自秦道嶠山青衣水來歸漢武帝天
漢四年分沈黎郡置西部都尉主青衣公孫述之有蜀
也青衣不服世祖嘉之建武十九年以為郡安帝延光
元年置蜀郡屬國都尉青衣王子心慕漢制上求內附
順帝陽嘉二年改曰漢嘉得此良臣也本志又有邛穀

王任君貴越雋人新莽之亂奮集英雄起越雋殺莽所
立太守枚根而自立保全一方見西南夷傳按州城隅
有任使君廟矣 晉末李雄竊據夷獠雜居西魏僑立
蒙山縣後置雅州郡國志云漢源縣有離堆蜀守李冰
所鑿離即古雅字也州以此名 圖經州治舊在雅安
山上大中祥符間國子博士何昌言為守以地多嵐瘴
徙于山之麓本志云州治後雅安山又名月心山山形
如月象心字州治左點所治右點文廟居中皆倚山也

禹貢蔡蒙旅平和夷底績葉少蘊解云蔡在嚴道蒙
在漢嘉漢嘉即嚴道也舊傳諸葛亮于此夢見周公因
立文憲王廟遂號周公山按文憲王廟記軍事推官王
育撰叅軍李夢徵書矣周公山半有石筍移之即雨窠宇
記云山勢屹然有龍穴常多陰雲李燾遊蔡山序蜀惟
岷山蔡蒙二山雅獨無有之本志云旅平者禹治水成
功旅祭于此俗呼為落平山頂有萬壑亭在焉 窠宇
記云和川路在縣界西去吐蕃大渡河五日程從大渡

河西郭至吐蕃松城四日程羌蠻混雜連山接野鳥路
沿空不知里數即禹貢所謂和夷底績也本志云東北
有和夷壩是矣 大唐新語云陸象先為益州長史奏
嘉邛路遠請鑿岷山之南以從捷近發卒從役居人不
堪道亡瘡死行旅無算左拾遺張宣明監姚嵩諸軍事
兼招慰使親驗艱險移牒益州曰此路高山臨雲深谷
無景至有斗絕巨險不通人蹤經之者必搏壁傍崖脅
息而度雖竟日登頓二十許里木人猶堪淚下鐵馬亦

可蹄穿象先覽之兢惕遽罷役仍舊路以聞蜀人賴焉
孫漸昭應廟記云其山蔡蒙其關邛崃水經注云岷
山東北百四十里曰崃山中江所出東注于大江崃山
邛崃山也在漢嘉嚴道縣一曰新道又東百五十里曰
崃山北江所出東注于大江故郭景純江賦曰流二江
于崃崃也 圖經云嚴道山在縣南五里本名鹿角山
唐天寶六年勅改為嚴道山山下有丙穴出嘉魚方輿
云萬勝岡在州西有龍觀寺其趾曰百丈山自邛崃或

起或伏環遶州治本志云諸葛武侯擒孟獲旋師至此
岡下人聚觀之因建亭于上為龍觀亭 碑目云高孝
廉墓碑在嚴道縣東二十里按其碑有年月乃漢建安
十四年立高君兄弟皆孝廉有二石闕其一曰故益州
太守武陰令上計吏舉孝廉諸部從事高頤字貫方其
一曰漢故益州太守陰平都尉武陽令北府丞舉孝廉
高君實字貫光又一大碑其首云故益州太守高君之
碑本志云漢孝廉高君墓在金雞山下孝廉橋墓跡蕪

沒惟二石坊在田中坊亦以大石堆垛而成非石柱也
其一方隸云漢故益州太守陰平都尉武陽令北府丞
舉孝廉高君仍有數字剥落方輿云金雞山在嚴道北
三十五里俗傳有金雞鳴于此循金雞山而上二百步
有石室中有石像為爾朱真人宋嘉泰中刻尚存碑目
又云羊竇道碑在嚴道縣東三十里金雞山下漢永初
六年碑也 梁益記云大小漏天在雅州西北山谷高
深沉晦多雨而黎州常多風故謂黎風雅雨宇文溥新

路賦惟天下之至險有巖道之漏閣焉孤峯上絕于青天湍波下走于長川斷厓橫壁立之岸飛溜濺千尺之泉洪造隸釋云蜀郡太守何君閭道碑光武中元二年刻此碑蜀中近出東漢八分斯為之首字法方勁古意有餘如冠章甫而衣縫掖使人起敬不暇雖敗筆成家未易窺其藩籬也碑目云平羌江繩橋碑在巖道縣平羌橋有唐咸通十年上官朴所撰碑字亦隸體今在江瀆廟方輿云平羌江源出西徼逵西北郭謂武侯平

羌夷於此又云沫水自廬山發源注于平羌江與沈黎之陽山江合流 本志云州西北一里曰清源橋東北十里龍門橋三十五里道遠填橋五十里魚喜河橋西七里曰銅頭河橋近多功路曰大繩橋已上皆索橋也凡橋每歲仲春于兩岸各樹兩梟長二丈有奇梟上橫穿二拘上布竹繩亘兩岸繩之餘者屈垂向下輓轡絞束復橫以木梯布以篾笆周以欄索其高低闊狹視江為度唐獨孤及索橋贊曰竿相引一索人綴其上如獠

之縛轉帖入淵如鳶之落尋撞而上如魚之躍頃刻不
戒實無底壑即此橋也 錄異記云唐王果謫雅州刺

史經平羌江中望岩腹有鐫棺欲墜緣崖視其碑曰地
裂山摧水漂我臨及長江危欲墮欲墮不墮遇王果五
百年後改葬我乃改葬之 本志云州北百四十里山
谷中湧泉深不可測一日三潮風浪如雷昔時白馬自
泉出田野間雲擁之復沒名曰白馬泉又曰龍淵又曰
龍門有宋紹興間祈雨碑猶存 此州韵事有雙鳳亭

在署廳後為蘇子瞻子由設至和中老泉携二子謁太守雷簡夫雷以書薦于張文定公及韓魏公歐陽文忠公其後大守樊汝霖作堂以表其事 無絃亭在州學

南長濱江側隱士王潛所居潛好琴趙清獻公為榜其亭曰濯纓文同書 黃魯直木蘭歌帖梁甫吟帖俱在

郡治 竹溪在郡西三十里隱士胥九鼎所居陶仙洞在焉有林泉之勝魏了翁寄題胥園詩云胥君頎然來錦囊背奚奴探囊發詩卷一一卿大夫識胥園面詩

卷自畫圖掃石卧石影長鋪斲芋區胥君于此時林泉
傲金朱

名山縣

禹貢蔡蒙旅平蔡屬雅州而蒙屬當縣矣九州記云蒙
者沐也言雨露常蒙也山有五頂最高者名上清峯有
甘露井水極清冽四時不涸相傳漢僧理真所鑿後日
隱化井中圖經云蒙頂茶受陽氣全故芳香獨烈方輿
云虞允文嘗為名山監茶今清溪橋頭北廳猶在有梅

及槐柳皆雍國手植壁間遺墨尚存 水經注曰縣有
蒙山青衣所發東逕其縣與沫水會于靈關道案宇記
平羗水上源曰邛崃水又名平鄉水西北自嚴道縣流
入自眉州洪雅縣界下又名青衣水本志云五頂山下
青衣河流逶縣前下田水口入嘉州 案宇記云羅繩
山在縣西五里從蒙山西流入廬山縣又北接邛州大
井縣又云鷄棟山在縣西南十七里地里志以蜀有雞
鳴山俗傳金鷄鳴天下太平也紀勝云鷄鳴山即古之

名山因為名山戍 碑目云名山治東一里許有紫府
飛霞洞開禧丁卯邑人苟洙于梓潼觀後甃一洞穴刻
神之父母像併鑿石龍蟠于其中請神作記親書于石
今石龍書院是也 本志云東北三十四里古土城周
七十二丈乃武侯征蠻所築遺址見存 寨字云大募
山在縣東四十里南接河羅戍北入邛州高七十里上
聳天際靈恠錯雜之所 九州要記云百丈縣本嚴道
縣地李膺記臨邛縣南百二十里至百丈即其地圖經

云有一穴口方圍百尺深如之山有九折坂夏則凝冰
冬則毒寒漢王陽為益州刺史行部至此興歎因之棄
官唐武德元年置百丈鎮貞觀八年改鎮為縣今之驛
曰百丈里曰安賢矣本志云百丈河在東北六十里源
自蓮花山來經百丈驛東與邛水合流至新津入白馬
河又名千尺潭又云百丈縣南五里銅鼓山為漢唐戍
守之地 寰宇記云泉池山在百丈縣東四十里山四
面縣絕上有泉池因名 本志又云東南七十里佛鼻

山左右有二目謂之天目元時於左目下建寺曰天目
有大石甕小石甕之名

榮經縣

寰宇記榮經縣本嚴道縣地東西連接大山並無州縣
巖巒阻絕不辨疆界唐武德二年置縣因界內有榮經
水口戌為名本志云榮水在城北一出相公嶺一出番
境經水在城南一出瓦屋山一出改丁河一出汶川按
相公嶺者以諸葛丞相征蠻所經也改丁河源出黑石

汶川源出邛崃馬耳榮經水北流入擒孟渡即孔明七擒孟獲之地 方輿云瓦屋山在榮經縣東北二十里形如瓦屋上有念佛鳥娑羅花其岩朝現辟支午現普賢夜有神燈或問禪惠大師瓦屋何故却以木皮蓋師曰錦府豈從機上織劍門寧自匣中開李燾詩瓦屋如廡平金仙闕光景 雅安志云榮經西北三十里紫眼關以紫眼番人僑寓得名即甕溪關 寰宇記邛崃關在縣西南七十里隋大業十年置約山據險當雲南大

路以扼番夷之要害碑目云邛崃關開路記天寶六年
章仇兼瓊撰又云漢蜀郡太守治道記碑在榮經縣西
三十里建武中元二年立又云尊健閣碑建武中元二
年物亦在縣西三十里景峪懸崖間巽岩李燾有跋以
辨正年譜且引後漢紀建武二十三年夏四月改為中
元無建武字又按祭祀志改建武二十三年為建武中
元元年以此知記與志合而紀失之矣又云神水閣記
碑在榮經縣東三十里銅山峽中碑久磨滅不可考古

老相傳其體大率如尊健閣云

蘆山縣

寰宇記云蘆山縣亦嚴道縣地晉書地理志姜維于此置城隋仁壽元年重開此地遂于姜維古城置蘆山縣以界內蘆奴山為名按紹興二十三年徐闕中記土人祀姜伯約有廟額曰平襄志云治有開明王城故址華陽國志蜀王開明以靈關為前門寰宇記靈關山在縣北二十里峯嶺嵯峨傍夾大路下有山峽口闊三丈

長二百步俗呼為重關通蠻貊之鄉入白狼夷界漢書
通靈山有眼孔四一名鏤靈山文選註靈關山名在成
都西南漢壽縣界陳陰堅蜀道難云王尊奉漢朝靈關
不憚遙高岷長有雪陰棧屢經燒輪摧九折路騎阻七
星橋蜀道難如此功名詎可要隋孔德紹送蔡君知入
蜀云靈關九折險蜀道二星遙乘槎若有便希泛廣陵
潮按張揖注史記曰漢鑿開靈山道于此置靈道縣矣
寰宇記云盧奴山在縣東五里與始陽山相接始陽

山在縣東七里本名蒙山唐天寶六年勅改為始陽山
高八里東道控川歷嚴道縣橫亘入邛州火井縣界又
云大渡水從生羌界來流入浮圖水浮圖水在縣五里
從生羌界來水中有孤崖狀如浮圖出貢金 志云蘆
山南十里三江渡通天全六番下注多功峽入雅之平
羌江多功河上飛仙閣為木棧道即古漏閣也 方輿
云龍頭山在蘆山縣前後峽綿亘四十里天橋如龍控
接番部實為要害又云崖鉢山在縣西三百里上聳雲

漢莫測其高 志云漢樊敏墓在縣南七里前有二石
馬隸碑在石馬東碑目云漢故檢校巴郡太守樊府君
碑建安十年三月上旬造又云兩面碑在廬山縣南五
里與府君碑甚近碑面與背皆有篆文歲久訛闕不可
識或辨其文曰廬山縣碑 宋趙明誠金石錄云右漢
巴郡太守樊君碑其文云君諱敏字叔達肇祖處戲遺
苗后稷為堯種樹舍漆從岐天顧亶甫乃萌昌發周室
衰微雲伯匡弼晉為韓魏魯分為楊充曜封邑厥土河

東肆漢之際或居于楚或集于梁君纘其緒華南西畧
又云總角好學治穀氏經貫究道度無文不睹于是國
君備禮招請濯冕題冠傑立忠謨有夷史之直卓成之
風鄉黨見歸察孝除郎永昌長史遷宕渠令大將軍辟
光和之末京師擾攘雄狐綏綏冠履同囊封挾長驅卑
走枕北國復重察辭病不就再奉朝聘七辟外臺嘗為
治中諸部從事又云季世不祥米巫妲虐姦狡並起陷
附者衆君執一心賴無滂耻復辟司徒道辭不往牧伯

劉公表授巴郡以助義都尉養疾閭里又辟奮義都尉
年八十有四歲在叶洽紀驗期臻奄忽藏形其後有銘
題建安十年二月上旬造他漢碑類多刊缺而此碑首
尾完存故載其大畧于此所謂米巫凶虐者謂張角也
宋成都丘常跋云此碑相傳名魏受禪碑為世絕出而
其款乃建安十年又在黃初之前雖暴露中堊而字畫
醇古文尚可讀豈非所寓僻遠而人無知者歟然而千
餘年間霖雨之所濯盛陽之所暴有獸已倒有門已摧

而此碑將仆是可憫也余因扶其既倒植其將仆又為
屋以庇之庶幾永其傳也崇寧壬午知縣丘常題 宋
程勤跋云皇上勵精更化以揚祖宗之大烈屬當京師
父老流涕太息思欲復見漢官威儀之時而僕仕于盧
山天下最窮處迺得建安十年巴郡太守樊君故碑於
深山榛莽間亟作大屋覆其上表而出之目其顏曰巴
郡太守樊侯之墓嗚呼碑陰所記崇寧壬午距今五十
八年而遙任斯邑者皆吾鄉人扶倒植仆偶相似然豈

物之廢興固有數耶紹興己卯眉山程勤懋傳書國
朝李一本跋云此碑踞于道周迄今幾千有餘歲矣在
宋以前訛為魏受禪碑大明一統志謂其字文漫滅不
可攷以故惑于聞見者不為注目予捧檄竊祿于茲屢
經過焉見其荒于荆榛蝕于莓苔亦謂信然越弘治己
未仲冬因偕門生白應清駱琰陳宣宋萬全等訪故偶
過其下因束篠為帚掃拂之倏見字畫隱隱而出皆醇
古迥異從者進曰此商彝周鼎復出也殆奇遇乎亟為

磨洗尋具指蜡如法摹搨得墨本有三蓋以防字畫之
同異者而考正之然其模糊不可讀者亦過半矣既而
歸置軒次校以隸本叅以衆目就其可識者僅得什之
九其疑誤者則傍為點注以俟博古者正焉載攷古文
苑所紀樊毅樊安等碑亦靈獻中所作其屬辭比事與
此文勢相類或者當時史遷之徒為之也夫文選所集
皆秦漢以來古文而此碑獨不見錄古文苑乃補文選
而作又不見載母亦此地僻在遐荒而人不知歟抑惑

于聞見之似而不及錄歟吁是碑雖不見錄于古幸而石不泐壞延有今日得以附入邑志以永其傳亦奇矣匪徒為斯邑之光實斯文之幸也然則世之為志者苟徒據耳之所托而不博歷以致審焉則雖有石鼓之文其不至于湮沒無聞者幾希矣是月十一日長至蜀忠南李一本識蘆山廣文也

蜀中廣記卷十四

欽定四庫全書

蜀中廣記卷十五

明 曹學佺 撰

名勝記第十五

下川南道

叙州府

宜賓縣附郭

水經云江水又東南過犍道縣北若水淹水從西來注

欽定四庫全書

蜀中廣記
卷十五

之華陽國志云夔道縣治馬湖江會輿地廣記云馬湖之上源曰若水出旄牛徼外南徑三縫淹水注之又東逕越雋之馬湖縣為馬湖水又東北至朱提縣與瀘水合至夔道入大江 夷裔考云夔人者其先世本華人有罪貶遠方以棘圍之故其字從棘從人漢制郡縣有蠻曰道故曰夔道其俗每歲六月廿四日為星回節競舉火把盈野居傍城郭與漢人無異水經注引地理風俗記曰夔人夷中最仁有仁道故字施而秦紀所謂夔

人之富也者其邑漢高后六年城之武帝感相如之言
使縣令南通甌道費功無成唐蒙南入斬之乃鑿石開
閣以通南中迄于建寧二千餘里山道廣丈餘深三四
尺其鑿之迹猶存王莽更曰甌治也 郡國志云甌在
施夷中最賢者多以荔枝為業園植萬株歲收百五十
斛益州記云荔枝潭在甌道縣山頂有一家惟生女貞
樹樹上常有白猿棲息古謂之玉女冢志云即峯巖也
在宜賓西百里山坡荔枝連袤今多屬廖氏黃魯直詩

廖致平家綠荔枝即此 圖經云夔道縣故址有三漢武帝時在中方鄉即今西南與長寧界接唐太宗徙于蜀江之右二江口即今府治武宗會昌中以大水復徙于蜀江北岸即今舊州 輿地紀勝云西漢夔道即漢武遣唐蒙鑿石以通南中者今石門是也本志云石門江在府西南百三十里俗呼橫江又名小江唐書韋臯傳石門即隋史萬歲南征之道古有詩云石城門峻誰開闢更鼓誤聞風落石界天白崩勝金湯鎮壓西南天

半壁按本傳萬歲入南中見諸葛亮碑銘曰萬歲後勝
我者過此 方輿勝覽云蘭山在夔道縣界圖經云蘭
生于深林石門尤多有春蘭秋蘭崇蘭鳳尾蘭竹蘭石
蘭諸名春蘭花生于葉之下崇蘭花生于葉之上黃魯
直幽芳亭記一幹兩三花而香有餘者蘭一幹十數花
而香不足者蕙 水經注云夔道縣有蜀王兵蘭其神
作大難江中岨峻阻險不可穿鑿李冰乃積薪燒之故
其處懸岨猶有赤白玄黃五色照水魚從楚來至此而

止言畏岷嶼不更上也本志云西北二十里朝陽岷是
華陽國志有孝子隗通為母汲江裔水天為出平石
于江中今石在馬湖江口 益部耆舊傳曰張員妻黃氏
女也名帛員乘船覆沒求屍不得帛至沒處灘頭仰天
而歎遂自沉淵積十四日帛持員手于灘下出時人哀
之語曰符有先絡變有張帛者也 寰宇記曰變道縣
有貞婦石在縣七里舊州岸古老相傳昔有貞婦夫沒
無子事姑甚孝姑抑使嫁竟不從終姑之世身沒所居

室有一大石湧出後人號為貞婦石 黃魯直跋王荆公
書云熙寧中金陵丹陽之間有盜發冢得隱起甌于冢
中識者買得之讀其書益山中宰相陶隱居墓也其文
尤高妙王荆公常誦之因書于天慶觀齋房壁間黃冠
遂以入石予常欲摹刻于夔道有李祥者聞之欣然鑿
石來請斯文既高妙而王荆公書法奇古似晉宋間人
筆墨此固多聞廣見者之所欲得也李君字聖祺夔道
人喜炎黃岐雷之書嗜好酸醎與世殊絕嘗從軍得守

國子四門助教歸而杜門家有山水奇觀教諸子讀書而宴居自如從其所好不喜俗人一再見輒罵絕之此孟子所謂有所不為者也 朱提漢舊縣屬犍為郡東漢屬犍為都尉蘇林云提音時晉太康地志云章武元年先主以犍為屬國為朱提郡鄧方為都尉先主因易名太守領漢陽等五縣朱提縣治有千秋池今府西南六十里有朱提山山下有大池曰瑞蓮池是又有朱提村今即立郡處也諸葛武侯云漢嘉金朱提銀采之不

足以自食古志云朱提西猶有鳩鵲以南則無矣 志
云瑞蓮池在府西南六十里馬湖江側故老傳云江有
石生魚常游聚漁者甚利之一日獲巨鯉衆分食之翌
日又至俄見江中有三石室各長丈許廣七尺人咸異
之顧見對岸石亦有三穴如鑿去者其長短與此無異
而向之食魚者所居皆陷沒為池矣巨鯉蓋龍子也池
有無種蓮或間十數歲一花花開則國家有大吉事舊
志朱提縣有千秋池疑即此今在朱提山麓按華陽國

志云湖江多魚此之謂矣 寰宇記云開邊縣在州西南六十里亦變道地隋開皇六年于此置縣以開拓邊疆為名在馬湖朱提兩江口大黎山小黎山在此縣界四時霖霖不絕俗以為大漏天小漏天其諸山自嘉州以來每峯相接高低隱伏奔走三峽石狀難名本志即今之開邊鄉也 寰宇記又云宜賓縣本漢南安縣地屬犍為郡蜀諸葛南征于此置郁郅戍後改為郁郅縣唐開元十七年為義賓縣後移于狼川即今理也宋朝

開寶九年改為宜賓縣 通志云宣化縣在宜賓縣境

本唐之義賓宋之宣化今省入者舊址在當縣之宣化

鄉 水經注云存水出犍為郫縣王莽之孱郫也夷率

雍閭繫馬於抑而抑成林故曰存馬本志云縣西北百

六十里為郫馭灘 蜀志補遺云可無山古宜賓縣也

今訛名可盧 方輿勝覽云夷牢山在宣化縣南夷人

祭社於此飲酒歡樂夷語以牢為樂故也二蘇有過宜

賓見夷牢亂山詩輿地紀勝云宣化縣南山叢秀中一

峰突出為菩薩頂故老嘗見聖燈碑目云宣化上流三十里吳季成所卜築在山之阿有山谷老人所書盤谷序虔州學記碑刻本志云復魚池在府西北百七十里故宣化縣東宋皇祐間白雲先生張俞為記 衆字記云梁武帝使先鐵計定夷獠乃立戎州以鐵為刺史方輿云宋紹聖四年戎倅蘇時上書曰今車書同聲教一而州名戎是夷其名也請易之遂改名叙州矣 唐劉蕪秋夕書懷呈戎州郎中詩素律初回枕簟涼松風飄

泊入華堂談雞寂默紗牕靜夢蝶蕭條玉漏長歸去水
雲多阻隔別來情緒足悲傷霜砧月笛休相引只有離
襟淚兩行 碑目唐都督李通破賊碑在州南百里今
亦殘缺又云唐古戎道記在州治之對天蒼山崖壁間
筆畫勁正乃乾封二年詹君秀修復此道為之記并書
又云定誇湖碑在戎州城外有唐人所立碑曰山蒼蒼
兮煙際橫波渺渺兮湖水平其餘漫滅不可考 古跡
考云縣有張儀同城古老相傳以為張儀同祠也不知

何義魏鶴山集有變道諸葛武侯碑又有答馮叙州邦
佐謝武侯廟碑啓本志云府城南姜維屯一峰突起高
千仞其頂平相傳姜伯約于此駐軍 勝覽云敘州有

東州道院在州治內碑目云治東墨妙亭貯黃庭堅筆
跡 杜甫宴戎州楊使君東樓詩勝絕驚身老情忘發
興奇坐從歌妓密樂任主人為重碧拈春酒輕紅擘荔
枝樓高欲愁思橫笛未休吹劉蕪重陽感懷詩重陽不
忍上高樓寒菊年年照暮秋萬疊故山雲總隔兩行香

淚血和流黃茅莽莽連邊郡紅葉紛紛落釣舟歸計未
成年漸老茱萸羞戴雪霜頭勝覽云東一里花臺寺
即今壽昌寺也東殿石壁露立大像其地内外石間鐫
有萬佛即刺史張九宗撰記處又云東山在州城東
門外有報恩寺塔高二百尺南望七星山七峰團秀狀
若連珠即南山也方輿記云西樓在州治陸務觀詩
畫船衝雨入戎州縹緲山橫杜若州須信時平邊堠靜
傳烽夜夜到西樓碑目云韋南康紀功碑在江西舊

州治岸溉元和五年刺史張九宗立碑陰載南康謝表
大半磨滅又云唐黎幹墓表在州西岸石馬溪之上今
石馬尚存 本志云馬鳴溪在府西十九里俗稱龍馬
溪源出慶符之西會馬湖水達于蜀江昔土人鄭氏牧
馬于溪上產龍駒四蹄利爪朱駿頰尾高可七尺州聞
之將以貢行在所載至溪口攘鬣長鳴躍于江溪因以
名 寰宇記滇池在州西二十里一名天池一名波凌
池其池長五十里闊七里風吹一動波浪凌山中有芟

荷按秦惠王破滇池始通五尺道者即此也志云滇池
與天池相連大者廣一里長五里小者廣一里長三里
其中有石橫亘南北如橋梁狀往來由之唐韋臯天池
晚棹詩雨霽池塘生意足花間誰詠採蓮曲舟浮十里
芰荷香歌發一聲山水綠春暖魚拋水面綸晚晴鷺立
波心玉扣船歸載月黃昏直至更深不假燭宋牟弘錫
詩天池十里如鑑湖荷花可折魚可鱸 本志云縣西
五十里水濱昔有浮舟者見空中飄然降一道人止於

峯頂土人呼其處為師來山後訛為書樓山 勝覽云
無等院在州南門外魯直以元符間寓居作槁木寮死
灰庵今猶存其寺額亦魯直筆蹟陸務觀詩文章何罪
觸雷霆風雨南溪自醉醒八十年間遺老盡壞堂無壁
草青青 李嘉謀記紹興初章蔡用事山谷以前史官
得罪安置黔州二年移戎州方公之遷以涪州別駕因
自號為涪翁放浪山水間初不知有遷謫困窮之意城
南有溪公遊而樂之命曰涪溪其後溪山悉以是名

本志云舊戎州南門外里許金魚井山谷品其水為第一
一 寰宇記云鎖江在城北兩岸大石屹立因置鉄絙
橫截其處控扼夷羌黃魯直鎖江亭酌酒詩西來雪浪
如魚烹兩崖一葦乃可橫酒盃未覺浮蟻滑茶鼎已作
蒼蠅鳴又云山繞樓臺鐘鼓晚江觸石磯碨杵鳴鎖江
主人能致酒願渠久住莫終更又云鎖江亭上一樽酒
山自白雲江自橫李侯短褐有長處不與俗物同條生
蓋同李仔任道也又安樂泉頌云鎖江安樂泉為犍道

第一姚君玉取以釀酒甚清而可口食之令人安樂故予兼二義名之曰安樂泉并為作頌姚子雪麴杯色爭玉得湯郁郁白雲生谷清而不薄厚而不濁甘而不穢辛而不螫老夫手風須此晨藥眼花作頌顛倒淡墨

本志云北二里鬱姑臺相傳宋楊仙遇鬱姑于此 又云

蘇溪在府北二里以蘇子瞻常遊于此故名 輿地紀

勝云自州治沂流十里有前後潭瀑布自懸崖千尺而下本志又云水簾洞在府北十五里瀑布瀉出兩峯間

垂數十丈如珠簾狀其側有亭黃山谷扁曰竒觀何師
心滿江紅詞一水飛空揭起珠簾全幅不須人捲不須
人軸一點不容飛燕入些兒未許遊魚宿向山頭款步
聽疎音清如玉三峽水堪人掬三汲浪堪龍浴更兩邊
瀟灑數竿修竹晚倩碧烟為純緣夜憑新月為鈎曲問
當年題品是何人黃山谷又云北百二十里真溪源
出于廬山舊有姓真者居之今為真溪驛又云北百七
十泐溪有阿泐者居其傍故名今之月波驛是余以壬

子暮秋宿此驛書懷作云月波來夜宿月色似波明遇
景一相湊觀空聊復情寒蟬吟似懶水鳥去何輕借問
渝州路還家近幾程蓋亦情見乎詞矣

南溪縣

漢地理志武帝太初元年置南廣縣隸犍為郡蜀志後
主延熙中立為郡以常竺為太守元和郡國志晉分朱
提郡置南廣縣齊郡廢後周于此置南武戍隋改龍源
戍又改為南溪縣在夔道之南水經注云自夔道至

朱提有水步道有黑水羊官水三津俱險極難行故人語曰檣溪赤木盤蛇七曲盤羊烏攏氣與天通禹貢華陽黑水惟梁州註云出南寧州南廣縣汾關山北至犍道縣入江一名皂水矣 郡國志犍為郡故城在青衣江七里舊經云青衣江在南溪縣南十五里古有青衣國與叙州相隣其人因賈至蜀見漢衣冠遂求內屬因以名焉其地名龍騰溪即隋之龍源戍今之龍騰驛是也 按青衣蜀中見者凡三其一在漢嘉者即大渡河

所經漢書公孫述僭據青衣人不賓是也其一在青神
者以蠶叢衣青而教民農事人皆神之是也其一在當
縣以古有青衣國慕義來賓云 志云龍騰山半有洞
深四丈李八百所鑿額鐫曰李公洞八分體字畫遒勁
可觀洞前有折梅亭宋楊萬里詩李真宅子故依然道
院西偏石洞前一日身遊八百里三番花落九千年
龍騰山下有岑參別業參從明皇幸蜀尋守嘉州置
國朝成化中掘得斷碑有南溪州三字傍題嘉

缺

缺

人岑參

缺

詩曰築室依青嶂開軒對翠疇

樹成花兩色溪合水重流竹徑春來掃蘭樽夜不收消

遙自得意鼓腹醉中遊志云溪北有橋曰黃渡魯直

每遊龍騰山必經此橋故名唐韋莊詩大江西面小溪

斜入竹穿松似若耶兩岸巖風吹玉樹一潭明月照銀

砂因尋野渡逢漁舍更泊前灣上酒家去去不知歸路

遠棹聲烟裏獨嘔啞蘇軾南溪對雪詩南溪得雪真無

價走馬來看次未消獨自披榛尋履跡最先犯曉過朱

橋誰憐破屋眠無處坐覺村居語不囂惟有暮鴉知客
意驚飛千片落寒條皆此橋中景物 寰宇記云馬湖
江從州西南流出東郭與蜀江合諸葛武侯五月渡瀘
則此水之上流也 郡國志云乞子石在馬湖南崖東
石腹中懷之螽人乞子于此有驗因號乞子石寰宇記
乞子有二石夾青衣江樹對立如夫婦古老相傳東石
從西乞子將歸 魚鳧津按郡國志云南溪縣西三十
里有津津南有鴛鴦圻是也鴛鴦圻者以烈婦黃帛得

名詳見輿道今縣有帛廟子在飛霞閣西阜上阜有飛霞井嘗有赤虺自井中貫日觀者如堵因建飛霞閣焉
祠廟記云南溪琴山有忠利廟祀漢牂柯太守陳立
廟中有制祠古碑張鼎修所記負山濱江地勢險阻

志云治西彈琴臺唐楊發彈琴于此瘞琴其下父老言
每夜靜人或時聞琴音發亦家于此有南溪書院詩云
茅屋住來久山深不置門艸生垂井口花落擁籬根
入院將鷓鴣鳥板蘿抱子猿曾逢異人說風景似桃源
志

又云隔江琴山橫洲渚間俗云無徽則琴不鳴元時熊萬戶者乃聚土為徽依岩閣鐫刻羅漢諸像以成其勢輿地紀勝云東南逾江七里有隱山唐李涉詩如雲不厭蒼梧遠似雁逢春又北飛惟有隱山溪上月年年相望兩依依 又云銅鼓灘在縣東十里大江之右波浪極險縣治坐乾此水出辰為不利近歲灘之上流生石磧高十數丈蔽壅下流水從巽出自是文物稍振衆宇記云西南十五里平蓋山山有九隴惟此特出衆

山之上頂圓似蓋一名瑪瑙山漢真人劉景竊隱此至
魏武時始跨鶴仙去有石洞深邃不測中有小穴圓如
盞有水出焉山上有木生葉其紋如篆謂之符葉也
志云西七十五里桂輪山昔涪翁書大桂輪山四字于
其岸壁是山惟中秋見月故名有桂輪山寺

長寧縣

圖經西徑馬湖南控烏蠻東介安溪北接綿水趙招討
平夷表云左連阿水右連石門也 碑目云長寧志嘉

定己邗教授賀寅東序亦云祥符平夷本末慶厯皇祐
平夷略元豐平乞弟本末嘉祐三年給長寧頭首斗蓋
充土刺史誥熙寧七年范中書百祿誓夷文皆有可攷
十道志云長寧涪井監供輸紫竹本志云縣西北七
十里古賢鄉宋時鐫崖曰紫竹山是也方輿引舊郡志
今夷衆開箐路爰去箐竹惟冬蒟醬可以入藥 蒙宇
記寶屏山軍治之主山也與械山諸峯相對登雲亭在
寶屏山上每歲九日登高于此 紀勝云牛心山在軍

治山形崱嶮如牛心然硯石溪在牛心山後岸石如磬
可以為硯 東溪發源白崖山與嘉魚泉者去城一里
馬鞍山之趾泉激石湧出小魚四時如一不增不長故
以名之邦人釀酒必用山後秣及嘉魚泉則味甘列王
章嘉魚泉記兵厨之酒冠于東州矣上有臨流閣流杯
池諸勝 志云南一里金龜山四面平疇中突一阜如
龜狀又名松子山輿地紀勝以其上有波瀾殿舊志邑
人于四月八日取嘉魚泉浴佛故曰波瀾也 勝覽云

介湖在郡治西城下中植荷芰有西溪發源越王山與
桃源溪合相傳有耕者得一銅版鐫曰小桃源其陰有
詩云綽約去朝真仙源萬木春要知竊桃客定是滑稽
人其水發源筆架山在軍城冷水溪上嘉定己巳太守
張公市民田種植桃李創置亭榭橋曰仙津洞曰桃源
亭曰蒸霞堂曰詒然 通志云萬松嶺在長寧縣西宋
趙使君詩清溪狹逕小橋東春日桃花處處同我為日
長無一事偶然來此聽松風 紀勝云小離堆在城北

岸溪上崇德廟前溪中有怪石似離堆之象因作亭于此榜曰小離堆 燕崖去軍北三里許在棲真洞路旁

石峰巉巖森列者數百虞易簡有記 本志東西二溪

至消井合流名消溪至武寧砦為武寧溪至安寧砦為安寧溪 碑目載王蜀武成三年牒消井鎮羈縻十州

五圍上都虞候羅元審又牒消井鎮羈縻消井土刺史羅元楚文俱在本監 歸田錄載蘇子瞻常得消井監夷人所賣蠻弓衣其紋織成梅聖俞春雪詩蓋當時名

重傳落巒猿故也

本志云東十五里武寧溪上有巨

石橫截中流虞允文鑿之以通舟楫石上大鐫虞公峽
三字溪左涇灘有瀑布自山頂飛流而下數十丈為深
潭輿地記云越王墓在寧遠岩高廣各數丈以花磚
砌有合抱古柏故老傳為越王墓或云唐太宗子越王
貞為綿州刺史卒塋此志云治東九十里有凌家崖
有水流寺遠眺敘瀘之景大江如帶矣

富順縣

華陽國志云江陽富義有鹽井郡國志劍南鹽井惟此
最大舊日為額八百餘斤今日額千五百餘斤楊光清
操堂記云三滌富順產鹽其地號為貪泉韓子華詩土
瘠事力耕家無終歲蓄所資鹽井利持易他州粟方輿
云宋太宗朝置監有榕齋在監治以榕木名也水經注
綿水湔水與洛水會逕牛鞞資中又東逕江陽縣方山
下入江按此水至富順神龜山下縈紆向西而去謂之
洛源以源出洛通江也後周于此置洛源縣矣謂之金

川以綿洛湔三水會于金堂峽也秦時于此設金川祠
亦謂之釜川則以其盤繞縣治有若釜形然 寰宇記
云鷄足山同心山俱在城東隔水三五里教授錢士開
記翠巘絡繹張其前大江繚繞環其下也 輿地紀勝
云神龜山下有湖嘗見大龜出小龜從之不可勝數山
背有讀易洞里人李睍讀易其中 李昌金川驛記南
距戎瀘北走普資舊制等于諸縣嘉祐以新例擬于列
藩本志云金川神廟在縣西二百餘步有十像莫知姓

氏相傳秦惠王時擒鰲治水有功即此神也 勝覽云
凌雲山在監西與養秀山相接大江前橫一峯突兀瑪
瑙山亦與凌雲相接西北諸山惟此最高 又云西湖
在監之西相傳有此監即有此湖皇祐間周侯延雋記
仍有亭榭輿地紀勝云西湖周迴三里有洞窈窕昔有
入洞者見二女櫛髮于竇間遺以石鏡其人致富百倍
碑目西湖洞前厓上鐫觀音大士像天禧元年刻石記
云六月甘露降像前明日又降紹聖元年又降瑩潔如

珠程驤富順西湖詩云春風楊柳曉藏鴉秋水芙蓉晚
著花細數一年湖上景天涯行客忍思家 志云西五
里中江之右有峰峭拔數丈如佛像傍有二石如侍者
對立因鐫成之藤蘿遶身而不上其面輿地紀勝謂之
聖佛有磨崖碑皇祐七年知監張齊古題云西山城郭
沿灘數里羣峯重疊一佛獨立容相端正真如塑出高
聳數丈古代留跡後倚林翠前瞰江碧 西疇在縣西
南七里輿地紀勝云由城南絕江而上西行六七里廣

六十畝萬松森列嘉樹離立為李氏西疇晁公武記云
有亭臺齋館泉石花木盤據一山之上 方輿云聖燈
山在監西五里碑目云山址有董孝子墓表云漢益州
刺史廣平郡侯董孝子 紀勝云中崖山在西北二里
山勢盤薄林木葱茂有叢林氣象有霧隱堂資中趙丞
相沂公謁中崖大士或以夢告明年舉于鄉公為文記
之後人為建斯堂碑目中崖普覺院天禧丁丑賜名康
定二年翰林學士李淑撰碑志云中崖以北崖山居左

瑪瑙山居右此居其中故名唐咸通中依崖鑄大悲佛像宋初僧自悟架屋三百楹天聖丁丑賜名普覺院藏兩朝宸翰後林靈素毀佛法欲壞其像圍繞鑿之不損乃以泥覆之罷禁將水洗去依然如新岑象求中崖詩瀟洒監城隈聊驅俗駕回世塵飛不到山色翠成堆太常博士周延雋詩茲辰始休沐夙駕出公府往造釋子居巖崎僅容戶雲林信樂耽安問非吾土衆香纔發春微雲忽蔽午敲石煎佳茗忘囂寥芳杜徘徊仍少留歸

泛凌前浦却顧衣上塵猶霑山際雨 志又云北崖在縣北二里隋大歷中建資國寺有彌陀崖足容數百人 有五百羅漢洞有水簾並元祐八年李元淵記

慶符縣

漢置屬犍為郡蜀先主置朱提郡以縣屬焉華陽國志云有漢水入延江本志云漢陽山在縣北八十里漢武通西南夷自此山之南皆漢地故云諸葛武侯征蠻過此今崖壁上鐫武侯征蠻故道六字猶存縣有順應廟

乃祀馬謖者我明永樂中尚書宋禮奏神有陰助運木之功賜萬貫葺其廟命有司每歲三月二日致祭也

碑目晉張麟夫人墓表在慶符縣南百六十里又云大唐南詔王碑在石門界貞元七年袁滋題云此石門即隋史萬歲南征之道志云祥州故址在縣西一里初本南廣地宋改名祥州置慶符來附二縣而南廣為鎮宣和中省州止存慶符縣黃山谷所書戒石銘尚存今來附縣為來復鋪矣

筠連縣

漢定川縣唐之筠連州也其地南通芒部西控烏蒙四山皆竹一色相連因謂之筠連矣志云舊州黃牛山距縣南三十里高山石壁有人作駝牛狀因呼為黃牛山也又云縣西南孔雀溪有孔雀巡檢司土舍主之

高縣

志云唐高州故址在縣南百二十里正州鄉縣有宋水勢如之玄有騰山常孕霧雨俱在西南五十里外

珙縣

唐羈縻薩鞏二州也薩州今之下羅計鞏州今之羅星
渡矣志云治南北五十步即珙溪也多石似玉民以筒
引車入田中得灌溉之利又云落哨山有生成石鼓二
石鼓圯下有仙洞石乳凝聚如人如獸千態萬狀至洞
頂黑質白章如雲如篆又云縣北四十里芙蓉山有九
十九峯其南三峯突起謂之小芙蓉

興文縣

戎州故址在寧遠坊之西唐晏州羅陽郡領思峨柯陰
新賓扶來思晏多岡羅陽七縣今皆屬夷南五里有南
壽山宋時夷酋卜漏據山為砦一豆一蠻數有五斗故
名五斗夷又十五里有丹霞箐旦暮霞彩浮于木杪也

隆昌縣

隆昌新設之地古跡無聞予問諸劉給事有金鵝洞焉
溪水東來遶城西折里許孤山挂立水環其趾下為懸
崖壁立千尺飛流下墜常時如匹練如散珠及至溪水

暴漲倒立懸垂雷聲衝激聞數十里細霧麴塵飛洒千步亦奇觀也峭壁中有洞方廣丈許人跡難至疑鬼工所鑿名曰金鵝不知所本俗傳有藏金鵝其中或以銅鵝換之故又名換鵝洞其編戶亦有換鵝里

馬湖府

屏山縣附郭

龍湖去郡三百里許四圍皆峻崖長二十里廣七里中有堆如螺髻去大江二里其水與江同消長日夕作潮

相傳有龍馬見于此 四夷考云馬湖江發源西蕃流
至打冲河入會川衛與安寧河合經雲南與浪滄河合
至武定與金沙江合經東川烏蒙始達于蠻夷司界經
府前流出與叙州江合 志云馬湖鎮舊城唐乾符中
高駢築按馬湖所轄地漢之氍縣平夷縣唐之瀘浪州
沐川寨也漢書氍有不狼山氍水所出隋志平夷縣有
砣津宋史寇瑊祥符中為轉運使多剛夷斗望叛瑊集
瀘浪刺史箇松李紹等平之 志云平夷東百二十里

有書樓山編戶為書樓鄉又云府西三百八十里雷番
山隋史萬歲征西南夷過此書雷番山三字鐫于石壁
山中有毒經過牲畜必籠其口行人必緘默若或吐聲
雖冬月必起雷霆 碑目沐川古碑唐垂拱三年玉津
令馬元慶等破馬湖夷紀功者張無盡沐川寨記畧云
南蠻東北接境常挾吐蕃以為中國患盖其路一出大
渡河一出沐川源一出馬湖江其狹邪之徑曰縈涇曰
八面箐曰黑水曰中鎮曰賴因曰龍水曰陰川而沐川

之路常為嘯集之地也



蜀中廣記卷十五

欽定四庫全書

史部

蜀中廣記卷十六

至

詳校官編修_臣翟槐

編修_臣程嘉謨覆勘

總校官庶吉士_臣何思鈞

校對官學正_臣陳本

謄錄舉人_臣羅允文

欽定四庫全書

蜀中廣記卷十六

明 曹學佺 撰

名勝記第十六

下川南道

瀘州

漢江陽縣蜀志曰魏武屯漢中諸葛亮出屯江陽是也
水經曰江水又東過江陽南洛水東南注之酈道元註

曰江陽縣枕帶雙流據江洛會也漢景帝六年封趙相蘇嘉
為侯國 洛水與綿水合至州西方山下謂之綿水口通志
云廢綿水縣在綿水西口汶江水中洲上梁置縣宋省入江
安矣 洛水逕資中謂之中江又謂之支江支江水從富義
縣鴛鴦池屈曲方至城與汶川合流又有赤水源從昌州昌
元縣界流入去合支江 有合州在州治東蜀江與之溪合
流處之溪源出仁懷縣其形曲折如之字 有悅江在州治
東北源出戎縣浩武箐經悅州因名 有思宴江在

州治西四里源出古思晏縣 有宋江在州治東百步
源出大壩兒北洞經宋州故名任汲記云淙流東北貫
其隅矣 李壘西山堂記云郡得名為瀘者蓋始因梁
大同中嘗徙治馬湖口置瀘州蓋馬湖即瀘水下流因
遠取瀘水以名州也志云宋制置使余玠遷州治于神
臂山則在百里外號錢瀘城矣 勾公權瀘川縣解記
云江陽氣候偏陽夏秋多炎燠冬無苦寒每夏秋蒸溽
如傍挹火爐韞 孫義叟修城記瀘控西南諸夷遠逮

巽蠻最爲邊隅重地元豐以來用武臣其後始更置儒
守錢若水以右贊善拜茲官宋太祖召見于武德殿謂
之曰瀘川最近蠻獠尤宜綏撫益重之矣方輿勝覽
云整暇堂雅歌堂俱宋時建在郡圃之內四香亭在州
治淳熙中郡守趙公建自題云永嘉何希深之言曰茶
蘼香春芙蓉香夏木樨香秋梅花香冬斯名以之有南
定樓取出師表語也陸務觀南定樓詩行遍梁州到益
州今年又作渡瀘遊江山重複爭供眼風雨縱橫亂入

流一名海觀侍郎閻蒼舒詩雲南之陰大江東二水奔
騰如海衝誰能具此壯觀眼南定樓中今卧龍 水經
注江中有大門小門焉季秋之月則黃鱗死漚也郡國
志瀘江水中有大闕季春三月黃龍堆沒闕即平黃龍
堆者昔尹吉甫子伯奇至孝後母譖之自投江中衣苔
帶藻忽夢見水仙美樂揚聲悲歌船人學之吉甫聞船
人之聲欵似伯奇援琴作子安之操按曹植之惡禽論
韓愈之履霜操皆指此事志云州東三里歸子山相傳

伯奇溺處 又云三國董允墓在州治東今名董允壩

方輿云東嵒在汶江之東紹興中邦人開創大像依崖不足以庇風雨近歲有庖者祁氏親死廬舍棄俗奉香火于此崖邦人信之不十年重樓複屋佛宮經藏甲於一境碑目黃太史大像記醉僧圖碑刻並在此嵒之開福寺 州志云東二十里潭中一小山相傳下有龍窟二水交流清濁不混每春漲其山若浮州人遊賞之處通志云即龍馬潭也唐王昌遇落魄仙授以道術比

歸售馬送道童于澤前得馬乘之瞬息至家而馬化龍
入潭潭上有冲虛碧梧二觀俱宋建 勝覽云龍女洞在
城東南二十五里高崖之畔有二穴俗傳為龍女洞李
巽巖嘗遊有留題 寰宇記云雙井在城西偏紹興中
掘濠塹得碑乃唐乾元中蘇德充所開 紀勝云滴乳
泉在城西真如寺自崖石中流出味甚甘魯直經行大
書此三字碑目云唐真如寺碑在本寺內山谷集云瀘
州大雲寺西偏崖石上有甘泉滴瀝一州泉味皆不及

也余名曰滴乳泉山谷又跋常山公書云常山公書如霍去病用兵所謂顧方略如何耳不至學孫吳至其得意處乃如戴花美女臨鏡笑春後人亦未易超越紹聖五年五月晦避暑瀘州大雲寺子茂携此書來妄意評之如此 竅宇記尹吉甫江陽人有祠在城南又報恩觀建清穆堂以祠之碑目李沆記周尹吉甫實生此地見於圖經舊矣陳帥損之作清穆堂祠焉觀酈道元水經注江陽異聞與華陽國志頗類其載揚雄琴清英叙

伯竒流放并子安之操附于江揚雄蜀人也其說必有據勝覽云寶山在城南初名堡子山為巡檢廨陳公損之移廨山西建堂其上索公說友榜其堂曰江山平遠易堡子為寶山大書揭之下瞰城郭萬瓦鱗集兩江合流郡國志一名瀘峯山高三十丈地多瘴三四月渡之必死唯五月上旬渡之即無害故諸葛亮云五月渡瀘也李壘西山堂記云以常璩華陽國志及辛怡顯雲南錄攷之諸葛渡瀘乃在越嶲之地非瀘之寶山也木



龍崖在寶山之趾有古榕木盤結夭矯如龍黃魯直為
題榜 通志云瀘州寶山之瀘峯有武侯廟每歲蠻人
貢馬相率拜于廟前宋劉光祖詩云蜀人所至祠遺像
蠻徼猶知問舊碑紀勝云黃太史書砥柱銘碑在瀘客
高寺 通志云三泉在寶山嵌崿間昔王大過鑿山濬
泉榜曰三泉 志云州南玄妙觀有紫房洞唐應靜煉
丹于此丹竈石床尚存有煉丹井亦唐真人酌挹之所
又云治南二里有懸崖石刻茶藤洞三字西南有飛雲

洞為唐庚讀書處按子西丹稜人徙居瀘之安夷門外
自號魯國先生有文集行世 蒙宇記方山距州南一
舍許又名回峯其山八面下瞰江流有魏武帝廟唐元
宗敕文華陽國志云方山蘭祠昔漢光武微時過江陽
有一子望氣者言江陽有貴兒氣王莽求之縣人殺之
光武怒為子立祠謫江陽人不使冠帶通志云顛池在方
山之頂周圍一里有龍潛其中 勝覽云北巖在城北
舊有小菴尚書楊汝明初為大利又創五峯書院以為

士友會課之所 志云州北二里撫琴臺山石生成周圍七尺昔尹伯奇投江吉甫登其上鼓子安之操焉

又云州北有薑亭郡人王綸以母姜氏卒終身不敢食薑因植薑于亭側以志不忘 又云東北二十里特凌橋宋治平中有女子因母病歸省溪漲不能渡忽見一木橫凌水面遂舍生以濟既渡失木所在 通志州東北有餘甘渡唐子西瀘川六言云百斤黃鱸膾玉萬戶赤酒流霞餘甘渡頭客艇荔枝林下人家 又云拙溪

在州東北七里黃山谷過而墜馬自以為拙呼為拙溪
書大字于石見存 山谷有瀘州中壩葛氏竹林留題
云江南黃庭堅自楚道蒙恩放還元符三年十二月道
出江安江安宰石諒信道以親親見留作歲建中靖國
元年正月丙寅置酒中壩葛氏之竹林而別

江安縣

漢地里志犍為之漢陽縣也注曰犍為都尉治山有關
谷漢水所出矣今縣南七十里連天山漢水出焉又西

南有漢陽山以在漢水之陽也廢漢陽縣當在此二山間寰宇記云涇灘在江安縣南三十里灘上有山刺天瀑布飛洒相傳武侯誓蠻之地此唐涇南縣所為設也縣有綿水鄉即古之綿水縣有思晏江即古之思晏縣矣本志云有縣市有井市宋南渡後置南井監在縣東北監有鳳凰山山上有雁塔刻唐五代以來進士題名勝覽云偶住亭在江安縣之對建中初魯直自夔道還過邑宰石諒同遊此亭書琴操後改為渡瀘亭碑

目瀘州平夷記熙寧中范百祿撰今在江安偶住亭志
云北城街有渡瀘碑亭宋時范百祿立自載其平夷事
迹今碑止存篆額熙寧甲寅平夷之記八字 都巡檢

使鄧巽陽安濟廟記曰吾邑城外汶江流其東涓溪匯
其左溪上陰崖峭峙草木岑蔚下臨深潭蒼黯寒碧有
神宅焉號曰五龍 紀勝云鏡子山在江安縣南五里
又名照山一峰中峙兩峯旁翼二溪交流峯巒蔥蒨菴
廬梵室金碧交輝旁有二潭為龍所居禱旱輒應山有

眠雲石龍淵橋汀墻崖磨鎌溪為一邑勝遊之地

納谿縣

宋紹定初割江安之地而立納谿則瀘川縣所為廢也
納谿水源自阿永蕃部為唐之羈縻納州納水所出矣
流至縣之西門與瀘江合 通志云縣東一里有樓子
山層峰疊嶂若樓閣然三里有拔旗山相傳諸葛武侯
豎旗于此以誓蠻人也又其遠者為保子寨倒馬關石
虎關則皆通牂柯且蘭交趾諸夷 本志云治西有寺

其地產青白石似玉曰玉林寺又云治北十里為舊縣
基昔人掘得銅犧象樽一太和羹盃二爵三貯于學宮

合江縣

漢符縣東漢為符節縣水經曰江水東過符縣北邪東
南鰓部水從符關東北注之酈道元註曰縣故巴夷地
漢武帝建初六年以唐蒙為中郎將從萬人出巴符關
者也漢元鼎二年立王莽之符信矣縣治安樂水會水
源南通寧州平夷郡酄縣北逕安樂縣界之東又逕符

縣下北入江漢縣長趙祉遣吏先尼和以永建元年十一月詣巴郡沒死成濡灘子賢求喪不得女絡年二十五有二子五歲以還至二年二月十五日尚不得喪絡乃乘小舟至父沒處哀哭自沈見夢于賢曰二十一日與父俱出至日父子果浮出江上郡縣上言為之立碑其鰥部之水所未聞矣 寰宇記安樂山在縣東五里八十步羣峯峭拔瀑布千尺天寶六年敕改為合江山圖經安樂山在合江西五里三峯俱秀溪流達其下有

石櫃為仙人藏經之所岐而左有爛柯跡後有仙影隱
隱在石壁中岐而右歷木楠臺仙人屋十二盤至剪刀
峽循山有八洞通南崖有石曰許由瓢又有芙蓉城滴
水崖白猿洞此三峯之景也黃山谷記云安樂山劉真
人飛昇之所真人字善慶初卜居時曰雙道平蓋氣濁
而不清江安方山氣清而不秀成山而清秀惟安樂山
耳乃居之碑目高唐宗取丹經詔碑賜進經道士詔碑
劉真人藏經碑俱在安樂山志云在本山經書峽中其

峽峭削人跡不到世傳蜀有黃澤書在揚子雲之前藏
于名山即此峽也 吏隱閣記曰宋治平四年鄧太師
綰作邑于瀘川曰瀘之合江邑居之南轉清溪而上六
七里曰安樂山世傳隋開皇劉珍先生登真之地杜光
庭傳李淑記開皇所置三觀其一尚在乃命道士作劉
真人祠堂因名其閣曰吏隱志云安樂山俗名筆架山
唐神童先汪有記今藝文不載惟載其一絕句云碧峯
橫倚白雲端隋氏真人化蹟殘翠栢不凋龍骨瘦石泉

猶在鏡光寒任仍遊安樂山詩云安樂溪上峯萬木生
翠羽孤撐切天心橫拓壓坤股氣勢西吞夷光芒南定
楚雲泉出石竇淋漓灑玉宇煙蘿纏林梢搖拽垂翠組
山有天符葉樹一夕大風雨拔去後得於容子山葉如
荔支而長上有紋宛如蟲篆或以為劉真人仙跡蘇子
瞻詩天師化去知何日玉印相傳世共珍故國子孫今
尚在滿山秋葉豈能神 安樂溪側有呂光廟符秦時
光討李馬之亂于此李暉詩西涼宮闕化灰燼一時壯

觀今何許又名登天王祠西南隅有之溪三逶筆架九
逶文明過月臺迤邐而去望如秋練形如之字注于江
南五里月臺山三溪旋逶山足形如臺面列十二月
波上有晉王廟祀唐李克用又五里丁山形如丁字倒
峙又曰文明丁火文明之象也有丁公廟其碑乃蕭齊
時立趙世延先氏書品記云合江之北有神臂山呀然
虛開清窈竦深廣袤百十步飛泉簾垂列巘屏矗嵐光
林影映帶左右與塵凡迥隔山之麓即先氏書品志云

錢瀘城三里讀書崑父老往往過之聞書聲後神童先
汪七歲至其地曰吾讀書故處也遂寢處其中為九經注
元虞集跋云涼國公勲業聞望著于天下我國家之著
龜也年七十餘閒居金陵又以文章學問為吾道砥柱
其得于天而裕于人何其盛哉讀書崖之記序其源委
博瞻考據鄉里晚生後進蓋有不及聞者吾蜀百千年
故家舊族若先氏崖者多有之矣安得一一表章于大
臣元老之手乎然先氏子孫所恃以不朽有不徒在于

崖者矣謝端跋云端蜀人也流離江漢間幾十餘年矣
某山某水不知幾何所覽讀書崖之記始知先氏世有
賢子孫哉端今老矣行於四方欲求一畝之居而不可
得吾蜀多異人異書何時扁舟泝江而上從書崖嵐光
林影之下求其遺書而讀之庶幾補過以希前修汝礪
其尚不吾却也夫

蜀中廣記卷十六